

見

聞

隨

筆

見聞隨筆卷十

婺源 齊學裘 子治

黃傳臚逸事

嘉善黃霽青年丈

安清

嘉慶己巳傳臚先大夫同年友

也著有詩古文詞傳世尤精書法道光庚子春余浙西湖返棹至魏塘袖詩請謁敬奉壽星竹杖一枝石章兩方長歌一章年丈見而愛之大開小竹林園下榻水月窗接宴息耕草堂縱談穩泊處索繪小竹林園圖按景題詩復以長歌殿之卽以畱別又索畫丈二尺宣紙大

幅雲山圖。丈題詩其上。三。迷離樹。悖懂山。雲一片。屋幾間。近可接。遠莫攀。樵徑斷。飛鳥還。疑此境。非人寰。欲往遊。愁老孱。清明後。園中桃花盛。開忽然風雪大作。滿園桃李盡變瓊花。一日黃俯之邀游梅道人墓。晚歸。丈問今日散步何處。以訪吳仲圭墓。對丈曰。我得仲圭山水大卷。遂脩酒肴。祭畫於墓前。屬友人繪祭畫圖。自題長歌。同人和之。甚衆。子治不可無詩。裘對曰。諾。夜飲園中。口應丈談心。起腹稿。飲罷。丈回家。余命老僕舉燭磨墨。伸紙疾書。稿成。卽命僕送呈丈閱。時剛二鼓。丈尚未寢。

接詩閱罷拍案驚奇。謂俯之曰。古詩之妙。固不待言。如此神速。世所希有。汝宜師之。毋貽後悔。遂加墨圈點。長評歎賞。明晨丈持詩并圖。邀同子未丈潘某封翁來息耕堂笑謂。裘曰。子治好詩。如同宿構。令人敬佩。顧子未曰。祭畫圖中詩。除老兄元侶外。首推子冶。長歌然乎否。乎子未丈曰。子冶十八斧法。難當其鋒。老兄之論。夫子自道耳。年丈大笑。隨命厨人備旨酒嘉肴。特爲賞詩。酒酣丈離席去。抄和裘所呈七古詩上稿簿。頃來擲筆。自鼓其腦曰。天平黃齋青。僅以詩傳乎。何不幸之若斯也。

潘封翁曰。人生能如齋翁詩傳亦足矣。何云不幸。表曰。年丈經濟寓文章。大才未大用。僅以詩傳。真年丈之不幸也。表亦不願。僅以詩傳。何況年丈哉。丈聞言。起立大笑曰。子治真可人哉。知我者其子治乎。南園圖成。吟詩告別。年丈畱行。邀表同遊天台雁蕩。爲作詩計。表曰。離家四月。柴米不敷。秋以爲期。追隨杖履。何如。年丈歎曰。吾不料子治處境如此艱難。天實爲之。如之何哉。畱住一十八日。贈程儀四十金。粵東貨物八色。贈行五古一長篇。盛饌餞行。年丈愛才悅士如此。越數年。余移居吳。

門西麒麟巷刻先大夫詩文全集成呈之年丈求作先大夫家傳越一載年丈來吳過訪小齋見裘以手加額曰可敬可敬典衣賣田以刻先集求之古人亦不多得况今人哉出示先大夫家傳稿本卽付剞劂刷印廣傳年丈見裘題鍾馗拜鬼圖歌拍案稱賞振筆和之裘命工雙鉤刻入寶契室法帖三集中後年丈來吳館張西齋司馬寓中裘謁之丈畱談至夜分記得中年在京當翰林時除夕見某同年家債主辱罵丈不能忍卽至都察院某同年處訴其事借衙役刑杖跟至債主辱罵家

至卽命役拿下債主痛責四十杖送至都察院枷號三
月假虎威以治貪狼平生第一快事丈爲潮州太守時
潮人患盜丈七晝夜捕盜不得片刻息有客官入覲過
潮來訪丈出見坐談身覺倦以肘靠几枕客官色變起
別去丈知慢客招尤急備程儀酒席送至舟中親自回
拜自陳捕盜七晝夜未息多多待慢統乞海涵客官不
答微笑置之半年後新放廣東臬司則前時過潮變色
之客官也丈聞一驚臬司到任凡潮州縣命案無不掣
肘三年公事極其難辦一日丈之同年某御史起服進

京過潮來訪丈畱之宴席間詢及臬司聲名狼籍可有實據丈以小摺授御史御史畧閱卽藏諸懷中而去逾時丈先知臬司被議鎖拿來京之信卽命駕上省垣請見臬司門口回官有疾不能見客爲辭丈笑曰不必瞞我貪職事發鎖孥在卽何疾之有丈卽將前靠枕之事三年受辱百端厯厯數之大聲疾呼雪憤未了提犯官臬司欽差已到頃刻鎖拿出衙丈步行隨後一路指罵而去此平生第二快事行年五十告養親歸田杜門却掃不問世間事謂妻曰我欲行者上司不肯行上司

欲爲者。我又不忍爲。上下不相得。薰蕕不同臭。也不退
何俟。年七十。寄自壽詩九章。余次韻和呈。端寫阿彌陀
佛經一冊爲壽。後到吳門。囑裘代延四方詩畫友。得七
十餘人。在七襄會館爲秋契集。大宴賓客。極一時文譚
之盛。逾年壽終。蓋七十有三云。辛亥十月初旬。舟次魏
塘。重訪俯之於小竹林園。展謁丈墓。感賦一詩。詩曰。不
到南園十二年。重臨水月淚潸然。先生騎鶴辭塵世。令
子剡門守硯田。三徑新篁無俗韻。千秋盛業有遺編。懸
知地下掀髯笑。白髮詩生拜墓前。附錄倡和詩於後。

庚子二月下潯西潯返棹訪黃霽青年丈於魏塘敬
奉竹杖一枝石章兩方長歌一首

詩卷長留天地間。釣竿欲拂珊瑚樹。少陵二語誰敢

當。魏塘今有黃叔度。

石印二方。鏤詩卷長留天地間。釣竿欲拂珊瑚樹。詞源倒流三

畝。水筆陣橫掃千
人軍。杜詩四句。

汪汪千頃波。難度澄之不清。淆不

濁。逍遙雲水一間鷗。超脫籠樊成嬾鶴。

丈有鷗間鶴
嬾小玉印。

勤勞。王事憶當年。潮州政績追前賢。多少蒼生望

霖雨。竟容名士乞歸田。習嬾得閒殊可喜。東坡笠屐

從此始橫掃。千軍筆一枝。遍題海內佳山水。三峽逆

入詞源流片紙隻字皆千秋。小子得詩再拜讀如醉。
初醒夢初覺廿年苦學寒蛩吟。一旦得師真是福。行
將鼓棹訪青蓮。從遊五岳尋飛仙。懸崖絕壁恐難上。
敬奉先生一枝杖。

子治世講過訪南園。以所著蕉窗詩集及石印竹杖
賦長歌見贈。次韻奉酬。

忽驚老眼披雲霧。玉立風前謝家樹。坐談安可無阿
戎。置膝由來有文度。子治爲梅麓同年令嗣。此君未易常情度。

末契還從老夫託。何意摧頽澗底松。能招沖舉雲中

鶴看君齒髮方盛年。鄭公三絕空時賢。飢來煮石兼

種紙。未妨陽羨無多田。詩成能令阿翁喜。髣髴元音

聞正始。袖携五色靈巖雲。

君家本籍婺源有靈巖四洞境極奇詭。

筆濯

三篙畫溪水。大波軒然江海流。酸吟肯作蟲鳴秋。一

編貽我燈前讀。想見蕉窗塵夢覺。鵬鷖逍遙等是遊。

林泉清淨焉非福。看花不羨相府蓮。置身不慕瀛洲

仙。小山一簣憑虛上。阿翁能來共扶杖。

留子冷下榻南園。倒次前韻索畫。

吾老不能遠策龍頭杖。懸崖陡壁直共猿猱上也復

不願躡跡蓬萊仙。浮江渡海一葉舟。如蓮向平願了
餘清福。今昨是非歸獨覺。日長何計破餘閒。有畫有
書皆可讀。南園斷手閱幾秋。草堂左顧多名流。一峯
之山一勺水。從茲息壤相終始。藜藿斬艾鼪鼯逃時
聽。蹙然足音喜。負郭劣有二頃田。尊中不乏酒聖賢。
但看四壁滄洲趣。卧游一室堪窮年。玉谿畫手今黃
鶴。心事憑將毫素託。蒼茫咫尺勢千里。短長束絹煩
量度。人生合并能幾度。君是茂林我枯樹。也須真蹟
爲儂畱。十日關門避春霧。

送子治回宜興并呈尊甫梅麓同年

通籍三十載。雙鬢驚摧殘。每見故人子。巍科居達官。
生才有差別。所得通人難。齊郎名父子。秀茁庭階蘭。
迅軼髦駒足。爽刷雛鳳翰。素向戀邱壑。治習刪綺紈。
偶爲有方游。不事長鉞彈。惠然顧老朽。一豁千愁鑽。
幸得子將詣。敢作鮑佐看。吳蓬卧三老。十日停釣灘。
把酒共藉草。啜茗同憑欄。說詩夜炮燭。讀畫忘朝餐。
有時聞法要。輒深啟子歎。但乞絹素掃。何取奚裋完。
坐令几席間。突兀生烟巒。淋漓元氣濕。墨水無時乾。

師聖不師心。進有百尺竿。藝也通乎神。小道良可觀。
而翁久解組。江湖樹騷壇。虞山與申浦。游蹤張沙搏。
交羣更拜紀。那慮鷗盟寒。于今別我去。超承鯉庭歡。
歸遲倘致問。爲我陳肺肝。蟬聯阿大語。畱滯非無端。
溪柳烟漠漠。籬花雪漫漫。歸艫望不極。清興殊未闌。
丈贈楹帖云。靈巖盪胸。畫溪滌筆。乃得此孤詣。大痴
仙蹤黃鶴妙手。今復見替人。

庚子二月二十五日。風寒雪作。時與子治同坐息耕
草堂口占索和。

鶴要讀華陽瘞鶴銘

梅嶽

小山曲折徑通幽。人共梅花幾世修。香雪滿林春似海。何如仙子住羅浮。

桃岨

爛漫紅霞映酒盃。尋芳客似到天台。天台四萬八千丈。都被先生携得來。

二月廿五日魏塘大雪。霽青丈以和子未丈雪詩示表。表時方繪南園圖。未成不及次韻。廿八夜枕上偶

高老馱焉能鬼手逃。一罌罄矣方酩酊。君今作詩將

鬼罵。下筆酣嬉不能罷。其奈鬼臂未曾紅。前人老吏詩錢鞵他

日鬼臂紅鬼膽那得怕。矧乃威靈有憑藉。卻爲老馱畱話櫛

分賦南園勝境共得七首呈齊魯丈

接引橋

不是長虹挂碧霄。名園一水隔迢迢。此間最是游魚

樂。憤聽獨吟人過橋

息耕草堂

蒼生無數望東山。底事秋風忽引還。縱有西疇可歸

老天心未必放公閒。

穩泊處

宦海波瀾不易回。中流幾輩賦歸來。試看水淺蘆深處。那有瞿塘灩澦堆。

水月窗

溪均流水碧淙淙。皓月生時影蕩窗。虛白室中都了了。夜深不用點銀缸。

友鶴亭

曾爲胎禽結小亭。籬邊新長砌苔青。我來不見雙棲處。

鶴要讀華陽瘞鶴銘

梅熾

小山曲折徑通幽。人共梅花幾世修。
香雪滿林春似海。何如仙子住羅浮。

桃岨

爛漫紅霞映酒盃。尋芳客似到天台。
天台四萬八千丈。都被先生携得來。

二月廿五日魏塘大雪。霽奇丈以和子未丈雪詩示
裘裘時方繪南園圖。未成不及次韻。廿八夜枕上偶

得一詩卽以奉呈

南園桃李酣春風虎兒得意潑墨濃硯池方寸騰蛟
龍風雲奔出湘管中青天白日忽生黑仰視長空如
潑墨狂風陡起來西北大雪紛紛一片白桃花倏忽
變梨花價長江南賣酒家炎涼世態想如此翻手作
雲覆手雨相如未典鸛鵲裘任爾漫天飛柳絮天公
深意我知之還要坡仙詠雪詩當時禁體都成例白
戰不許寸鐵持自捫儉腹笑空空險韻重吟定不工
獨樂園圖將脫稿春光依舊屬溫公

爲霽青丈繪南園圖成并賦一詩卽以畱別

不作畫已近十年。哦詩終日成癡顛。世人紛紛視白眼。賤子出門笑仰天。天公有意成就我。特令中路逢坡仙。坡仙今住魏塘上。小築園亭寄幽暢。扁舟一葉西湖來。袖得新詩親馬帳。先生見我到。欣然笑口開。畱我十日住。携我南園來。下榻水月窗。縱談穩泊處。接宴息耕堂。索笑梅花樹。情深千尺桃花潭。何以報之心懷慚。不才自笑中書禿。命繪南園圖一幅。愁無佳句娛青蓮。敢操破筆追黃鶴。刻意經營日復日。天

台庾嶺方圖出

荷嶺桃
翻晨騰

芥子可納須彌山得毋造化

藏筆端先生笑且言孺子尙可教畫家重取神總在

能離貌一言知遇重山河感激不已吟長歌吟成拜

別載詩去

丈惠詩
四首

心係汪汪千頃波

題黃齋青丈祭畫圖

梅花道人畫中豪使筆如使昆吾刀鋒能切玉渾餘
事游刃直可剗秋毫破空而下不可擬金釵玉屑堆
滿紙崇山峻嶺陡然起忽接一片滄江水咫尺真堪
論萬里氣勢磅礴誰能似祇有白石老翁耳有時寫

竹三兩竿。出入與可東坡間。豈特墨戲高千古。草書
揮灑龍蛇蟠。雲林山樵皆妙手。若論勁斂惟子久。家
藏真蹟有八九。不及先生所藏深且厚。先生藏畫思
道人携至墳前奠杯酒。道人有靈當快心。五百年來
得一友。當年賈島曾祭詩。先生祭畫祭更奇。要知此
舉非偶爾。祀典一出千秋知。祭畫圖不忍讀。讀之令
人雙淚落。一坏之士橫目前。筆墨生涯多感觸。

題鍾馗秤鬼圖爲伊松坪作。

吾聞鬼有大小辨。故新未聞鬼有肥瘦秤。重輕嗟哉。

鍾馗生而爲英死而爲靈驅鬼縛鬼殺鬼啖鬼無不
精任彼山精水怪魔王鬼母大力不得逞厥能此理
易曉非難明能克百邪憑一貞吾獨不知何鬼重何
鬼輕亦復不知秤鬼重輕何所嘗試問鍾馗馗不應
著意秤鬼立階庭柳枝縛鬼鬼哀鳴得毋秤罷將就
烹方今聖世何以魑魅魍魎猶橫行海風吹人
作血腥安得鍾馗降此司雷霆一舉手九垓清大鬼
小鬼皆潛形妖孽掃盡蒼生甯嗚呼安得眼前卽見
鍾馗來復生驅鬼縛鬼殺鬼啖鬼用快蒼生情

呂祖師門弟子

湖南左清石仁吾故人也。知宿遷縣事。有吳人習醫者。忘其姓名。招牌上寫呂祖師門弟子某。捐五品銜。終日出入衙門。慣撞木鐘。招搖撞騙。一日守府患熱症。某誤用蠶附一劑。立斃。左素與守府交善。聞之怒甚。往送入殮。索方觀。方中有一味藥。有三名者。袖方回衙。籤提某醫到堂。將其刻板呂祖師門弟子招牌擡來。左坐大堂。某醫衣冠來見。長揖不跪。左大怒。汝是何物。謬稱呂祖弟子某。曰。扶鸞得蒙呂祖師收錄。晚生爲門弟子。故有

此牌耳。左曰胡說。左出方示之曰。守府患熱。汝下薑附
殺之。是何居心。方上某藥。有別名否。曰無。左怒。命出本
草醫書示之。此藥共有三名。某無辭以對。左曰。爾在此
害人殺人。有年矣。我今特爲罔死鬼報讐。卽命去其衣
冠。重責一千小板。打得血流滿地。臀無完膚。枷號示衆。
枷上硃書。自稱呂祖師門弟子。某妖言惑衆。劣醫殺人。
枷號三月。一月後某病篤。取保放歸。旬日斃。官紳百姓
稱大快事。左知震澤縣事。到任未百日。盜賊站籠死者
八十餘人。路不拾遺。夜不閉戶。十餘年後。復署震澤。爲

漕務鬧事撤任從此杜門却掃日與詩僧高士游不問
人間世矣著有詩文集未刊行寇至吳隱居東洞庭山
病卒余曾記清石說夢至一處堂上三座首座文信國
公二座楊忠愍公三座無人楊謂左曰殺身得不死彭
慳非正命十字余當時意其必能殺身成仁捨生取義
者不料其明哲保身優游泉石以終天年也清石曾刊
左氏雙忠集表彰先賢清石豈其苗裔耶何剛毅之若
此也二子伯敷仲辛能詩文工書畫仲辛尤工鐵筆皆
有官職

水落鬼成神

常州陽湖鄉間有扳魚爲業者依樹搭棚扳繒達旦有水落鬼時來與談扳魚者喜飲鬼亦喜飲每夜人鬼同酌鬼酒酣便下水趕魚入網得錢沽酒與鬼作長夜飲樂甚一夜鬼來告別飲不成歡漁者曰何往曰明日午後有笠者過此風吹笠落水客下水拾笠我便拖腳入水淹斃之得替投生故來取別明日果見笠者遇風吹笠落笠者欲下水取笠漁者急止之勿取笠此塘多水落鬼要討替身客聞言縮足不下望前而去是夜鬼來

怪漁者說破機關。不得替身爲恨。漁者曰。勿惱。爾去我。便無伴。獨自飲酒。有何趣味。况塵世多憂。不如冥間之自得也。鬼然其言。趕魚飲酒如故。越三年。鬼來曰。明日又得替身。真箇要投生去。漁者問是男是女。曰。是女。飲酒告別相對唏噓而已。明日見一婦蓬頭散髮。臨流大哭。意欲投水。漁者好言相勸。事姑要孝。事夫要順。作水落鬼不如做人快活。勸之再四。婦氣平。拭淚回去。夜間鬼來怒曰。好事又被君弄壞了。漁笑曰。救人一命。勝造七級浮圖。爾得替不替。功德無量。其將爲神乎。快浮一

大白勿介於心也。鬼聞言大悟。不作投生想。夜夜伴漁。暢飲。頗得鬼趣。逾年。閻君點鬼冊。知某水落鬼。二次臨替。不替。當升土地。某處土地出缺。着赴任。鬼來笑曰。君言驗矣。閻君點冊。知我二次脫替。當升土地。某處土地缺出。着我到任。君從此不必扳魚。好到我任所。做個香火廟祝。亦足過世。記之。忽忘去。明夜鬼果不來就飲。漁亦收網。襍被以從。到某處。果見土地廟新開光。與鬼友形神逼肖。因與地方父老說其緣故。土地先示夢衆人。知有老漁翁是土地公公故人。遂請漁翁爲廟祝奉事。

香火以終天年。余聞其事。喟然歎曰。鬼能修行。便升爲神。人能修身。豈難作聖。其如行之不修何哉。書此以自警省。毋忘漁鬼之修行云。

小香

無錫俞望之工寫生。沈旭庭之同硯友也。八都爲兵部司吏目。屢空晏如也。有伶人小香者。色藝俱佳。馳名有日。慕俞風雅。因與契交。凡俞喚小香出局。終不言錢。交情愈深。無何俞疾作。小香勤事湯藥。無虛日。尋歿。小香哭之哀。衣棺後事。皆小香一人承辦。家人來京盤樞。小

香又助多金其高誼如此視世之勢利結盟酒肉交友財盡交疎勢去盟寒者其相去何啻天淵如斯類者真小香之罪人也俞君得遇小香所謂得一知己可以不恨旭庭口述樂爲書之

小雲

揚州名妓有小雲者頗愛才尤好名人字畫與富貴人交必恭必敬徒取金玉錦繡而已從未嘗有一心交也見有寒士風流儒雅氣宇軒昂者則心焉慕之有急難傾囊救之乏考費倒橐助之人呼爲女俠客良不謬也

吳讓之揚州善書者也。曾爲小雲書楹帖集成語云。小
於么鳳輕於燕。雲想衣裳花想容。吾友沈旭庭云。曾見
小雲時。西寇初次陷城。克復後。此聯猶懸齋壁。二次城
陷。小雲他適。不知所終。世之欺貧重富者。小雲視之。真
禽獸之不如也。如小雲者。當以心香一瓣奉之。

行脚僧自刎

梁溪北門外高長岸人某。來城兌洋貳百元。值打包行
脚僧。窺其囊中有物。隨某行至郊外。天欲暮。野無人。某
心怖。速行。僧亦速行。伺其後。適霧起。某潛身岸下田缺。

中僧遂置包擔道左持刀直前追之某見僧向前去遂上岸反向後走挑包橫路而歸包中珍寶不下數千金從此作富人僧追之不見人退而覓擔則杳不知其所之矣徘徊道路空手持刀擔無影蹤無可如何自刎而死乾隆年間事旭庭與我言之余曰行脚僧之自刎宜哉身入空門貪殺不戒包中物皆不義之財也人遭其毒不知幾許矣而某隨機應變遇難成祥非具大智慧者何以臻此吾能鬪智不能鬪力由此觀之智取勝於力者多矣

水西張二先生

水西張二先生。宜興水西人也。家有薄產。人丁單弱。父爲人欺。張二憤氣往少林寺習武藝。拳勇三年拔成。歸里鄉。里無賴少年畏之。由此安居。道光初年。余患咯血。遺精癆瘵之症。百藥無效。偶遇張二於隣人周三裱畫店中。張二見余氣虛力乏。謂余曰。君有虛症。非藥所能醫。余曰。然。服藥無益。奈何。張二曰。是不難。只要用易筋經摩腹一法治之。四十九日。卽愈矣。余延之。緣天小構。坐卧與俱。飲食同席。子午二時。令卧桌上。以手摩余腹。

離腹數分。推左扳右。覺腹內輪轉有聲。運氣置腹臟腑。
調和。漸能食飯。又治遺精之症。只川鉛條半寸闊。半分
厚。開合如耳環。兩頭外卷。置紅頭繩。睡時持繩分開。枷
陽之根。睡後陽起。鉛枷嵌痛。痛卽醒。醒卽坐起。吞津陽
遂軟。精不遺。再睡。陽再起。再用前法治之。此卽修鍊家
孫行者上腦櫃之一法也。月餘諸症皆愈。張二年逾八
旬。望若神仙。天賜異人。療余瘵疾。今年六十有四。健勝
中年。皆張二先生之賜也。恩同再造。何日能忘。至其武
藝通神。筆難盡罄。特書事畧。以永其傳。

見聞隨筆卷十一

婺源 齊學裘 子治

張涵生太岳傳畧

無錫張涵生

茂東

公吾太岳也。世居西門外。家貧破屋

三間。太岳母日以紡織爲生活計。公善書算。多病失業。口饒思食肉。無錢買肉。蹣跚往岳家。岳母一茶待之。而已憤甚。賒藥以歸。藥鑪置半牆上。煎至片刻。藥罐有聲。半牆自坍塌。地陷一穴。以火照之。見一小缸。探缸內。盡是寶銀。約三四千金。公取一小錠。買雞魚肉。紙錢酒飯。奠

窖神只取百金爲川資。仍以土封固。戒內子勿妄動窖。藏旋病愈。治裝出門。問卜利往西方。於是趁船。日夜向西而行。半月後。舟泊江邊。見大船來泊。俄頃又見一小艇。直對大船停橈。艇上坐一僧人。手把算盤。對大船撥子不休。公知僧人決非善類。欲以術法算取大船金銀。遂取算盤。與僧對算。僧見有人破法。技無所施。搖艇遁去。大船頭立一老叟。見公與僧對算。又見僧遁去。心知公非常人。遂邀公上大船。細詢家世。姓名里居。出門何營。公以直告。叟善相面。尤精算命。見公相貌魁梧。氣宇

軒昂八字主大富。遂與公訂交結盟兄弟。謂公曰。愚兄薄有家財數百萬。生業滿東南。祇生一子尚幼。不能代父勞。兄老矣。欲覓替人。求之不得。今得吾弟。眞天賜也。凡兄東南店業全歸第一人督辦。此後利金兄弟兩股平分。卽將賬摺字憑交公收管。十載爲期。山西重會立書議墨兩紙。各人存據。盛筵話別。將大船家丁付公常用。自携小童駕小艇回鄉。公由是東南分馳營運七載。一路順遂。獲利金六百八十萬。年近四十。尙未有子。思歸念切。遂訪盟兄於山西。交賬卽擬南旋。聞公來出。

郊迎接唱戲接風情深骨肉交賑七年以來統獲利金六百八十萬。照議墨兩股均分。公該得利金三百四十萬。公辭不受。叟固與公始受利金二百四十萬。却金百萬爲盟。兄壽儀叟復以黃金萬兩爲盟。弟贈散歸至家。室人依然紡織爲業。旋生子。卽挹山先岳也。公居家布衣粗食。終日持籌營運。年來五旬。家產已逾三百萬。一夜隔壁隣家被盜。明火直上。公常守夜。聞人聲。見火光。開門視之。見盜持刀。呵曰。快進去。不干汝事。公驚閉門。無恙。先岳長成好結交。鄒相國炳泰。孫制軍爾準。皆其

盟兄弟也。喜刻書工書法。善鐵筆。輕財重義。有豪士風。公與某錢莊銀錢往來。某暗刻張涵生圖記。流播於外。先岳暗下支用銀錢。戒勿令公知。張涵生圖記。卽某索先岳刻者。一日早上。公付某錢莊銀二十萬。是夜某莊合門逃遁。在外銀票上。皆是張涵生圖記。一齊來向公索逋約二十餘萬。緡人勸公呈子抵賬。爲解逋計。公不忍。照票發錢。人始散。公由是得癡疾。常懷寶銀。與途人。不一年。怏怏而歿。

朱處士

陽羨朱橋亭老詞翁吾故人也古貌古心性靜情逸喜
談話工算奕處貧茹苦晏如也衣棕色布袍歷三十年
無一汗點填詞構思達旦不寐或一年得一首或半年
得一首意深詞達律協音和吳穀人史補堂兩先生素
所佩服皆爲序弁其簡端同鄉徐星珊觀察代刊詞稿
行世庚申之變宜荆矢守年八十餘宋一慟而歿真白
石老仙之流亞歟惜其詞稿流傳甚少安得購其遺本
而重刻之以償吾願子桐孫工畫

張刺史

休寧張聽竹刺史

朝翰

承父分授家財二十萬金爲布

商開張吳門閭門外義慈巷廣交天下士自都中王公大臣以及江南督撫司道以下無不知有聽竹者其爲人也言而有信義而有禮救急扶危樂善好施故人樂與之交余曾至其家見其所用陳檢討湖海樓著書硯張船山先生題畫心甚愛之摩挲不置張曰君愛此硯卽以持贈余拜而受之余藏硯百餘方從兵燹中帶出兩硯其一卽公所贈硯也張曾出示友人投贈書畫箋扇數箱約數千柄屬爲鑒別高下余展閱五日定其甲

乙承贈書畫俱佳。便面二十餘柄。其交游之廣。酬應之
闊。概可知矣。道光初年。張爲人籌辦捐官事務。余患咯
血。不能鄉試。意欲捐納。小吏致書於張。懇其代辦。張回
書云。小吏不合君爲。我代君捐。通判候到省。得缺後。再
還我錢。何如。我少不樂仕進。性又不肯負人。故力辭謝。
祇須得一小吏職銜足矣。未能免俗。聊復爾爾。張終日
應酬極繁。積勞成疾。年未五旬。卒于二。皆廩膳生。

潘明經

宜興潘曉村

光序

明經品學兼優。生徒科第者甚衆。少

時隨父宦遊淮安清河教諭與先堂兄康進士知縣改
教授淮安府教授爲同寅後隨父廣東縣任辦刑名書
啟父歿盤柩無力歸里變賣舊產獨身入廣扶輿歸里
設帳爲生涯喜友才士謙光照人好爲詩古文辭有集
未刊行善飲酒暢談古今笑聲達戶外道光十四年余
因伯宏始識曉村月後余遭家難寄住綏安山中曉村
亦館於桃溪余氏家相去十五里詩筒往來殆無虛日
綏安梨花三十里花時置酒邀客如徐祖香伯宏慕雲
朱橋亭崔仲綸戴柳堂陳文俊文新文耀蔣安壽諸君

飲酒賞花同吟香雪。不工詩者。罰之以酒。作十日游。長
夜飲。互爲主賓。詩箋滿壁。五色琳瑯。顏之曰。詩世界。卽
余所居雲畱軒也。曉村六十生日。余延之雲畱軒。邀友
朋畢至。共置酒爲壽。余繪圖題詩以壽之。曉村自壽詩
五古四章。約百十韻。稿初脫。從桃溪館中專人送至綏
安。釣橋辰時接詩。走筆和之。已正脫稿。封置詩筒。交書
童帶回。桃溪中飯饒上。和詩已來。見者歎爲神速。不置。
同游龍池。倡和達旦。余會題其攤書。浮白圖七古一章。
又題其文集五古一章。刻在蕉窗詩鈔四卷中。後人見

之亦可想見其爲人矣。余刻先祖兩峰公思補齋日錄。乞曉村爲序。并諸簡端。久已傳世。居山七年。移寓吳門。三太尉橋曉村。旋亦辭館歸家。教育羣英。逍遙墨林。每逢文讌。必歎曰。玉籀入吳。舉座減歡多矣。掃墓回宜。必先訪曉村茶話半日。而別曉村年七十。余壽之以詩。逾年無疾而終。子一名謙。受號竹虛。茂才。工小考。時藝。有竹虛小題行世。年五十餘卒。孫二。長怡。卿茂才。次業儒。兵亂後。怡卿無恙。自今思之。令人下淚。如曉村其人者。蓋亦罕矣。如之何勿思。

余星橋

吾友余君星橋武人也。曾爲葛雲飛提台大將。葛與英夷戰七晝夜陣亡。余飛出重圍遁迹江左。曾館溧陽伍牙山下王薌堂孝子家。教其二子技勇。與徐伯宏友善。常郡張宦家亦請其教子武藝。余善書。早起臨柳誠懸元秘塔三百字。用純羊毫懸腕書之。性靜心細。與人交接怡然如處子。每以易筋經授徒。來吳門寓學士。窗甚低。樓板甚薄。人行樓動。一日予同客訪之。寓樓見其徒以沙袋木棍自打兩臂兩股。余懸筆臨書。書畢自

取茗壺斟茶。敝客旋捧湯饌兩碗。從樓窗進來。樓板不
動。湯水不滴。食畢。持碗復從樓窗下。街樓窗上下如過
門檻。予曰。君之神勇。大概可知。請示一技。可乎。余笑曰。
無他技。余何時。余兩足跟贴壁而立。言畢。胸面雙手一
齊貼壁。下視足跟。仍然貼壁不移。上下身旋如兩段。此
其故不可解也。從此一別。後遂杳然。

符孝廉

揚州符南樵孝廉

葆森

吾盟弟也。著有詩詞稿。未見刊

行。繼

國朝詩別裁後續選詩數百家名之曰寄心集

二十四冊選先祖雨峯公詩三首先君詩五首拙詩三
首刊在集中符至吳門主於顧湘舟藝海樓蘇公祠與
余偕和互相題圖余到揚州邀符同游平山堂酌酒賦
詩符忽得瘋疾舉步維艱館金山縣令署中有年尋卒
子業儒亂後不知何處寄居近晤揚州王小汀詩人知
其子尚存無恙聊識數語俾吾子孫毋忘符君選詩之
高誼云

侯學博死難

金陵侯青甫

雲松

學博居碑亭巷著有根香圃詩稿傳

世工寫生年逾八十康健如仙咸豐二年余同左清石到金陵始晤青翁贈之寶硯室法帖數種青翁寫生一幅長歌一首祝余五十壽余卽次韻奉和青翁多情又約湯雨翁公分招飲余與清石辭謝有秋以爲期之約青甫貽詩志愧余和詩告別咸豐三年金陵失守青甫求死不得西寇養之老人館中逾月病作命舊僕剃髮尋卒僕覓棺塋於高原至其子孫安否何如則不得而知矣倡和詩附錄於後

寫祝玉谿仁兄大人五十誕辰初意以紙幅大屬割

而爲二。茲畫有餘幅。拙句亦附錄。仍併而爲一。希兩
教之。侯雲松并識。

畫家之壽身。其康金石之壽尤延長。况君年歲方富。
強。吉金樂石多珍藏。昨來坐我堂東廂。高談娓娓風
生涼。贈我石刻蘇暨黃。蕉窗一卷鏗琳琅。君家太守
雄文章。昔年倡和邀挖揚。君起而繼名譽彰。一家著
作誰頡頏。示我書畫皆擅場。乃復索及薑芽僵。自言
將介五十觴。屬耆艾者爲之倡。許我潤筆非姬姜。精
婢願以精帖償。來書中語衰遲那復謀專房。且訂石交毋

忘君年百歲。纔中史壽世之業。在縹緗。排次石墨。
樂徜徉。摹搨不惜金壺漿。便是不老千金方。

與湯雨翁公訂奉邀玉谿仁兄暨清石公祖假館追
涼而來。書皆體恤。賤子衰老。未可觸熱出門。有秋以
爲期之說。賦此志愧。

官奴渡口泊輕舟。刻欲招邀上酒樓。爲怕炎歊侵水
檻。竟虛良會卻冰甌。披來簡翰詞尤美。過辱矜憐老
可羞。還恐紆期延爽籟。重逢容易負清秋。

予年五十承金陵侯丈青甫八十八歲老人壽之以

畫并贈長歌感不去心次韻奉答時壬子六月

畫家何緣多壽康宇宙在手命自長九十老翁精力

強身易高隱名難藏碑亭

碑亭巷名

屋破東西廂梧風蕉

雨延清涼寫生終日研丹黃吟詩作記堆琳瑯會心

天地大文章隨意揮灑皆清揚盛名豈藉青雲彰今

人誰可相頡頏嗟予久避翰墨場眼膜未刮十指僵

贈我屏幃誰濫觴引年尙齒君宜倡竊聞偕老失孟

姜精婢可代願可償

予許以精帖代精婢爲大潤筆時文有筵室之感

仙山

不必求雲房是翁卽仙何日忘交訂忘年樂未央辭

歸裝畫裁縹緗高懸素壁堪徜徉食桃餐菊酌瓊漿

醉卧思君天一方

桃菊皆畫中物也

秦淮水榭納涼用侯青甫丈舟字韻

纔向秦淮泊小舟納涼先到水邊樓好拋江上山千
疊來啜花間茗一甌青眼易邀名士盼白頭難避素
娥羞莫嫌酷暑消無計柳岸蟬聲已報秋

王丹麓

磁州王丹麓

承櫟

吾盟弟也善畫山水人物獅象道光

廿四年來吳爲余作畫最多贈余分書楹帖云開卷常

交千載上。閉門如在萬山中。吳市得董香光山水巨冊。索余題跋。時有忝舊欠而反欺凌者。余爲之排解得收。前債賦歸與。後官河南爲通判。不復見云。

包大令

安徽涇縣包慎伯大令

世臣

先子之故人也。著有安吳

四種集傳世。工書法。中歲爲江西縣令。因漕挂誤去職歸田。流寓揚州白下等處。咸豐二年。余刻寶稷室法帖。初集十二冊成。二集六冊。三集六冊。尙未告竣。出游袁江。訪慎翁於河帥園中。以所刻先集拙詩集拙書帖寶

稷室法帖就正有道謬加褒讚不已手書睽屏見贈楹
帖云日有所思經史如照久於其道金石爲開屏書六
片與余論書學源流頗以余爲知音又作拙刻寶稷室
法帖五大字并長序一篇見惠寫作精妙歸付剞劂并
諸帖首暇卽徒步訪余於于湘山觀察舊雨軒暢談逾
時而去時高伯平錢東平寓王公祠日中會晤四人同
飲東平好食魚翅每飯必具魚翅一大盤慎翁勸東平
少食魚翅諷其日用太費也東平笑曰包老恐我要餓
死余曰東平自餓不死東平每飯必食魚翅恐爲食肉

者垂涎側目爾愼翁聞言捧腹大笑別後聞愼翁往海州就養哲嗣興實仕所途中遇盜不知寶藏王右軍大都帖墨蹟無恙否受驚等卒逾數年屢見興實刺史於丹陽仙廟糧臺今記愼翁兩世交遊并錄其寶契室帖序於後毋忘父執之高誼云

寶契室法帖序

予論學書有句云心已不及目手更如心何蓋學人得古拓其始也以心運目以手從心稍久則字勢在而未能上手此人所同苦而共知者也最後檢帖

則目能識掩卷則心未能存是則心不如目非沉酣
數十年幾不解爲何語然非有真正古拓隨俗執筆
高者事塗澤以悅人下者記名姓而已彙帖始于昇
元予年二十六有志學書友人惠假昇元初拓戎路
調元畫贊枕肱三載差見古人正書用筆之故繼得
淳化棗本及澄清堂五卷思翁採殿戲鴻之祖本漸
通行草嗣得大都帖真迹以澄清堂拓本較之神理
相距猶遠然後信米老雙鉤至精者乃下真迹一等
之言不虛也時工鑄時賢之書氣味相近常得其真

至摹古人手蹟風尚久殊若重摹舊拓隔膜尤甚佳者略存形骸而已近世彙帖輩出鉅冊大部可人者不過數種如鬱岡齋之缺角樂毅論渤海藏真之靈飛經戲鴻堂之歐千文柳摘句之蘭亭詩至寶齋之曹娥碑綬後軒之外出帖秀餐軒之蘭亭西昇經夢禪室之夢奠爲精善與單行之劉太冲爭坐位律公客舍大仙俱爲善本蓋單行本皆珍弄墨寶精撫問世不似彙帖之誇多鬪靡故也是以善學書者廣收彙帖以備書勢而精研筆訣以究書源然古人論書

多有強作解事。望誤方來之談。務宜察其是否。以一趨向而定旨歸。齊君玉谿子同歲生梅麓先生之長嗣也。弱冠遭孟嘗之厄。搯危慮深。克自樹立。梅翁厭世。迺哀集其詩古文詞。并旁求乃祖雨峯先生之遺片紙隻字。悉付之梨棗。復取梅翁生平購藏歷代名家手迹。及梅翁所見深慕而不能得者。委曲乞假。覓良工摹拓。爲寶稊室帖。前後三集。共二十四冊。以卒先人未竟之志。又其庶弟皆稚齒。或不善守成業。玉谿悉心爲經理。使不失所。庶幾無忝所生。爲孟嘗之

後勁者已。況所刻諸名迹。什八九皆梅翁使予別其
真僞者。今閱墨本。多能逼真。遠過前此諸刻耶。梅翁
在天之靈。當嘆古人所云父子之間相爲知己之不
易言矣。予幸觀厥成。故爲題其首冊。咸豐二年四月
二十一日七十八歲老民包世臣書。

劉地仙

道光二十一年英夷作亂。牛制軍

鑑

帶兵鎮守上海。着

吾友楊蕉隱

振藩

來蘇。特訪地仙劉清溪先生。楊先到

余寓西麒麟巷。同訪劉於火神廟後。至其寓見小屋一

間隔爲兩進前堂後房。一几一榻四椅。旁有小竈茶爐。几上置香鑪茗椀。課簡中壁挂鬼谷子神像。右壁挂年羹堯所贈清溪先生詩數章。署幾欸。有小童看屋。問師何處。曰師出爲人安竈去矣。少頃卽至。坐片刻。劉果回。身長五尺長眉方面。鶴髮童顏。飄飄有凌雲之概。相見一揖。呼童取茶。茶罷互道姓字。楊達牛意奉請到營商辦軍務。請卜休咎。夷亂何時得平。劉曰夷務主和不日卽平。天下事患不在夷。無須小老一行。問其高壽幾何。笑曰無多。再問垂眉不應。余與楊告退。後數日再訪不

遇聞其鄰居老叟說少時見劉先生鶴髮童顏與今無
二不增不減劉先生於雍正年間爲年羹堯軍師時年
已老至今一百二十餘年幾及二百歲逾時夷果主和
議息兵戈余再訪劉問道至卽飄然遠徙不知所之矣
客謂余曰劉真地行仙也爾既遇之曷不乞授金丹以
換凡骨乎余曰坡仙詩云不願學長生但學長不死人
之所以長留天地間者蓋自有道在耳血肉之軀壽夭
一也何足道哉客唯唯而退。

富陽二孝子

寶山蔣劍人

敦復

言胡孝子謙富陽慶護里人生有至

性七歲喪母哀毀若成人既長以不逮事所生也事後
母姚尤盡孝父病涉江求醫至湯家步陰霾風怒號舟
人搖重戒勿渡孝子不可自操楫至中流溺仰天呼曰
死矣如吾父何一斷木躍浪至觸于肘挾之出沒洪濤
巨浸間俄頃達岸兩岸見者咸大驚尋得醫市藥歸父
病良已他日于病涉處造舟置田除道築亭遠近賴利
濟焉父歿廬墓所終三年母病則辭于墓而歸省及愈
仍往母恒鬱鬱念姚氏無後爲立一法喪祭得如禮母

好佛。乃建一庵于近側。邑令某顏曰。悅親紀實也。其他庸行。及諸義舉。詳相國董文恪公所爲傳中。乾隆十三年旌。

蔣孝子元順。富陽大源莊人。四歲喪父。家貧。偕其兄曰樵。采以養母。兄夭。母哭之誓。終其身得風痺疾。孝子負以臥起。食飲匕匙。便旋踰廁。躬進奉之。弗稍懈。妻朱亦賢。食姑恒飽。已則糠覈而已。病歸母家。遽歿。孝子懼傷母心。弗使聞。頃之。乃言曰。得好婦。亦易易。無深念也。母患頭眩。祈神籤。須野猪腦。鮮荷葉。時隆冬。二物不可得。

則之餘杭。越嶺冒風雪。顛踣幾殞。迄無有。旁皇空山中。
繼之以泣。忽獵者提一物至。視之。野猪首也。大喜。長跽
道。所以獵者憐而取。腦與之。返溪中。浮一葉。果鮮荷。益
大喜。歸進母。眩頓差。有稱其孝子者。嘆曰。吾不能愈吾
母身之疾。天酷我。天酷我。奚孝云。晚年家漸裕。有三子。
九孫。以上壽終。人僉謂行孝之報。咸豐五年旌。余謂人
孰不愛其親哉。顧門內之行。質之隱微。士大夫猶愧之。
一失其心。萬事瓦裂。可不大哀乎哉。考 國家旌門盛
典。婦女多全節。著男子鮮孝行。書厚人道。薄天倫。非其

明驗與余以修志來富。寇警不果。避兵山中。聞二孝子
事。亟書之。裨名教。維世運。不獨爲此邦采民風者助也。

訟師惡報

婺源余星垣明經。與余言道光年間。如皋有開豆腐店。
其妻有外交。一日被夫撞見。與人私。夫怒。持刀殺其妻。
所與私者遁去。不得殺某患之。商於訟師某。訟師曰。庸
何傷。候明朝侵晨。有買豆腐漿來者。隨殺一人。當奸夫。
便可挑兩人頭去報官矣。某然其言。奉教而行。歸家夜
磨利刃。以待來朝。黎明。聞叩門聲。便持利刃開門。見一

人便殺之以當奸夫。細視其頭。則係訟師之子也。大驚。奔告訴師。求恕誤殺之罪。訟師無可如何。遂令某將頭。送官。以了一重公案。諺云。害人害自己。由此觀之。其言。真不我欺。

設救生船德報

余星垣與余曾言道光初年。漢陽有善人某。創造救生船。在漢陽以救往來客船。遭風浪沈溺者。一日狂風大作。波浪掀天。覆一船。救生船急出。救出溺人一個。視之。卽創造救生船主人之子也。諺云。救人救自己。良有以

也。

孝子指斷復連

咸豐十年。長毛到松江城外濶街。有一老者。被長毛刀
斷傷。血流不止。僵卧在床。其子歸家。見之。遂將刀斷一
中指。補父傷處。血立止。臂如故。父起床。子欣欣然笑舞
承歡。自視其指。無一斷者。噫。孝能格天。天其佑之。有如
是者。休甯方嘉進。孤子與余言其事。特書之。爲天下後
世之爲人子者鑒。

文昌帝君開心聰明神咒

附魁星神咒

九天大帝身披白衣。日月照耀。乾坤幹音挖。隨有能敬者。

聰明如斯。黃老丹元。與念合宜。五神衛守。八聖護持。誦

之不輟。萬神赴機。我司大化。光耀生輝。心開茅塞。祛鈍

除迷。誦之萬遍。文治瓊瑰。詞源浩浩。筆陣風馳。九天開

化。萬章洞微。玄皇上帝。勿稽勿違。急急如玄皇上帝律

令勅。魁星神咒。唵。通靈呀。通徹呀。通靈達悉。

呀。通靈奇悉呀。奇特達悉呀。奇靈奇特奇達呀。

唵呀。撥呀。唵唵撥撥呀。叫呀。專呀。莎呀。

訶。魁十三筆一筆一
句共十三句

見聞隨筆卷十二

婺源 齊學裘 子治

汪封翁德報

婺源對塢汪驥翰林

正元

之祖也少時賣布爲業偶到

鄱陽湖宿客寓夜聞鄰家夫婦哭泣之哀詢其緣由知其夫爲債主所逼將賣妻還債夫婦不忍生離故哭不絕聲汪聞言惻然歎曰古人云悲莫悲兮生別離無怪其哭泣之哀也設有人代償其債可畱婦平鄰人父老皆曰可畱汪遂傾囊如數四十金贖之某得金還債訖

遂焚賣婦券。破涕爲笑。一時鄰人傳頌。汪德不置。汪教子孫讀書。子茂才蔚文。孫翰林卽正元也。咸豐己未科。浙江舉人。王戊科進士。入詞林。字少霞。同治二年。少霞出都道過南通州石港場。訪余於于家莊。得識一面。越三年。余寓泰州城北。與巖前戴維辛明經間談。因說少霞在浙候榜。測字得一恕字。少霞謂測字人曰。此字我代汝測。贈汝百錢。何如。測字人欣然曰。諾。少霞提筆將女旁加三點。水是汝字。口字中加一豎。是中字。心字中加一撇。是必字。共成汝必中三字。又與夾路張某中雲。

李某撞戲見戲臺上一人提鑼報喜人問中者何姓曰
非張非李是汪姓也揭曉汪果中式舉人人謂汪驥好
善得有賢孫記之爲好善樂施者勸

猪異

文登縣于次鶴

壽之

通守從河南來泰州與余述乙丑

年河南督學歐陽

保極

考衡輝府有豆腐店所豢老母

猪攔輿長跪不去使者問猪有冤乎猪卽點頭遂命差
隨猪去到店空地上猪墾地差掘地得屍一具使者發
省究問傳聞逆子殺母也按律誅之

畫異

封邱縣古廟中畫壁上人馬忽然下地奔馳見者大駭
遠近來觀縣官惡其惑衆封鎖古廟以寢其事于次鶴
口述

藏畫招尤

泰州城隍廟東鼓樓巷前翟懷卿茂才於江蘇庚申之
變時流民來泰翟以青蚨四千文購得倪高士手製竹
石霜柯一小立軸上有五律一首云十一月燈下戲寫
竹石霜柯并題五律一首久客令人厭爲生只自憐每

書空咄咄聊以腹便便。野竹寒烟外。霜柯夕照邊。五湖風月起。好在轉漁船。雲林子下有圖書一方。名人題跋。悉與書畫彙考相符。上有石琢堂殿撰藏印。余在蘇城曾向毛一亭孝廉借觀數次。手臨數幀。與黃穀原主簿同賞歎爲世所希。有不意於劫餘垂老之年。猶得復觀於江北友人家。真眼福也。翟愛倪畫過於頭目。同治五年丙寅十一月。江西黃栴川太守從滁州來。代李某觀察購畫來泰。黃聞倪畫在翟家。訪知翟父當泰州官吏。遂與州官長雲衢刺史商之。長曰。翟某州吏也。其子藏

倪畫得價不昂。取之便。于是飭家人五班坐索倪畫。父懼官威。逼命子呈畫。免禍。子曰。秀才可革。畫不可奪也。頭頸可斷。畫不可勢取也。父怒呵不已。畫終不出。予聞其事。大爲不平。乘月携兒童往代排解。到門見懷卿之父靜何。大門內如恐州差之復至也。見我到大喜。開中堂延上坐。與余述其事。責其子之不識時務也。予以好言慰之。卽擬作書致黃與長。力解其結。其父聞言。感謝不盡。次日余徒步出訪黃。勸其勿學古人豪奪之惡習。使人家父子不和。越一日懷卿來謝云。現有趙漁亭出。

爲調停倪畫擬價一百六十金。俟黃價來。卽將畫往云。
云余曰。翟懷卿真壯士。他日爲官真強項吏哉。倪迂何
幸於身後數百年。得一知己。逾年黃客死於滁。書之爲
世之藏畫者不眎人者。鑒爲世之見物便起奪心者戒。
人面瘡孽報

婺源查姓。服賈他方。悅一尼姑。私訂終身。尼將衣物銀
兩付查携歸。約期來取。誰知查歸家。將尼衣物銀兩營
運生息。逾年另自娶妻。負約不娶。尼待查三年不至。訪
知查娶妻。投繯而死。查家居納福。忽夢見尼來索命。次

曰膝生大瘡形如人面。日食豬肉數兩。不餒之食。卽唧唧有聲。痛不可言。夜間更痛。查命家人延僧懺度。足終不許。數月後瘡大潰。命遂絕。妻另嫁人。財物散去。張榮春述其事。書之爲世之負心者鑒。

湖山張孝女

婺源西鄉湖山村張某妻子俱喪。祇有一女在室。張老憂愁欲出家。女慰之曰。爺勿憂。有女兒在膝前奉事。足供子職。爺在堂。女兒誓不出門。張然其言。憐其孝。遂不出家。女蓬頭赤腳。親搥井臼。服事乃父至百歲。終天年。

女亦年逾古稀矣。鄉人重其純孝。並請旌焉。張榮春述。

犬咬符咒

人被犬咬。卽於土地上書一虎字。口念咒曰。一二三四五。金木水火土。凡人被犬咬。請土地揭起土來補。咒念罷。卽以口涎吐在土上。揭土敷在患處。以手摩之。立愈。

治難產方

硃書語忘敬遺四字於黃紙上。貼在產婦卧床對面。令人口念四字不歇。立產。又一方。用藏香焚之。立產。藏香不可使女人著手。女人著手。便不應驗。

機星現

同治六年正月二十七日二更時分機星現於中天光芒四射共有二十四道至三更星滅安徽鮑花潭學督按臨江甯試院中見此星查星圖知爲機星吾親戚戴彝齋茂才鼎銘在幕閱卷目見耳聞與余述之余曰捻匪猖獗其機星乎

月中下雪

戴彝齋云丁卯正月十四夜在江甯試院中見星月皎潔忽大雪寸許星月依然亦一奇也

地震

丁楚王庶常原籍泰州寄籍泰興與其子柔克言道光

十年五月二十二日戌刻直隸河南山東山西陝西等省同時地震而直隸之磁州尤甚壓斃者萬餘人可稽而報冊者僅五千餘人衙署城郭民房蕩然無一署中有五六人團一室中門牌一室全覆而數人皆悉爲梁空處架住得不死乃徐徐破屋而出又一縣幕友某正寫文卷聞地震屋欲坍心慌急思排闥而出所用之筆猶持在手適至門而門已壓下乃急歸房以兩手扒窗

欲出而以所持之筆橫啣于口。蓋忽遽忘擱筆也。時梁
又壓下。斜壓其顙在卓。而口中所啣之筆適代爲抵住。
以故不傷。遂爲人救出。甚矣筆之爲功也。此公蓋以筆
救人而還。以自救者。揅筆者。可不動心歟。柔克于咸豐
二年引。見出都時過磁州。見城外大橋皆崩。甚疑之。
今始恍然。

猪言

丁庶常又言揚州東臺縣地名安豐場。有曹四者畜一
猪。壯將賣之日。午有客來許價五千六百文。曹索錢六

千未售晚間曹出其妻忽聞曰曹四汝莫賣我也其妻驚問以爲人聲秉燭尋之則無次日客復來出價五千八百曹復不售晚間又聞曰曹四汝莫賣我也聲音極似其母急燭之則正在猪柵內猪方流淚問猪是誰猪乃言曰我汝母也問何至於此曰汝嫡母生產時爲我所害而死故致此報蓋曹之父故妻妾二人曹乃其妾生妻以產死爲妾所害無知者使非自言則終無知之者因涕泪交流言憶其女其姊妹皆奔歸鄰居有孝廉姚古亭名典在目擊其事爲釀錢五千六百文買送東

臺三昧寺放生。余亦道光十年正月在三昧寺親見之。紫琳曰：此猪得免于烹宰幸矣。意別有小善以解此厄耶？然烏知非天之故畱以示報也。

異物

直隸某縣有大蘿蔔。一年一枚。大如圓棹面。凡出則親朋鄰友必置酒相慶。每年必有有則饌一枚。別縣則無。廣東有火鳥毛。白如雪。蘸油燒之。枯黑如炭。瞥眼復成一白毛。又火布。火鼠火雞之不同。此毛余所目擊。又聞陝西某縣鴨蛋皆方有稜角。河南鷄蛋其黃在中。蓋河

南爲天地之中也。

女化男

馬啟田明府言吳家楣解元生一女名吳紅字其甥莊某。女頗秀美能詩文。年十五六。莊某已游泮矣。將訂台。番而其女忽一夕小腹痛甚。漏五下始昏昏睡去。及旦驚醒已化爲男矣。遂退婚習舉業。與莊某往來爲詩文。交夫婦也。而朋友焉。豈非千古奇事哉。後孝廉聘山左某氏女爲媳。携其子走京華。某達官家課讀。余應試都門。曾遇孝廉及其子。朝夕詩文往來。大慰旅懷。丁雪符

云

狐友

丁言余姊之舅官天津總兵未顯時居家誦讀聞叩扉聲急啟之見老人童顏鶴髮年約期頤烏巾藍袍青杖赤舄長揖而入延之登堂自稱胡姓心知爲狐而人品甚高風度亦雅不惟不異且加敬焉狐曰聞君高誼故過談今果名下不虛願納交自是過從甚殷意氣相得一日狐曰君貧甚我當助之凡櫝中青蚨用時卽取不必言無當如源泉滾滾不絕無何狐曰我奉命守京都

正陽門明晨卽去。間卽來。漏四下。灑泪而別。于是設位供奉。每年必至四五次。每次必四五日。家人但聞言笑。夜靜忽爲步履聲。叩爲誰。狐必答。習以爲常。亦不之怪也。癸亥夏。余走天津。詢狐踪。云前秋僅一來。邇年公趨不遑。幸乘傳解厲鬼三百去南方。暫屬土神守之。特來過訪。不能一日留也。欷歔嗟歎。聞之淒然。狐之子獲罪守滇南。其女守九江之琵琶亭。名極雅。惜忘之矣。

尸鳴冤

丁雪符言過廣西靈川縣時。見一役解男女二囚宿古

蘭若中。旅寓間步。姑詢其何獄。對曰。有石姓者。採樵爲生。其婦與鄰人某通。欲謀殺其夫久矣。一日夫婦與鄰人某皆樵于此山。遂以斧殺之。而棄尸山頂。三日後。別一鄰人過此山下。死者立山頂而呼之。鄰人問數日不歸之故。遂泣告曰。我已死矣。令陳顥未。鄰人趨視至山頂。則傷尸一具。遂鳴之有司。故置此二人於法。檻車解之也。噫。附體鳴冤。覆盆可雪。厲鬼攫賊。淫惡可誅。此亦常事。未有光天化日之下。如人告語。殆亦得請于地下。而示此異歟。獨怪奸夫淫婦。爲歡幾何。卒駢首凌遲。可

快也。

治疝疾

丁言劉文典如臯人在直省候補典史自言幼有疝疾每夜睪丸腫大如雞卵且過焉一日與某人同齋卧床相近飯後無事偶憩某床上床頭有說鈴一本方摺一頁隨手翻看是頁正說某處某人幼患疝疾與其病同後其母屢禱于神夢神告之曰汝子食田雞之故也若不食田雞當佑汝子愈其子後不食果愈時劉亦素食田雞正患病發卽隨心默禱永遠不食當晚卽愈至今

卅年不發。此事劉親爲余言。

沙市舟火

丁雪符云。余于咸豐十年過楚時。至荊州沙市。日已晡矣。欲就一碼頭繫舟。而此處之船。皆稱船不合帮。堅不准擠進。蓋沙市船多。欲泊舟時。必分船而進也。然天色昏黑。江水洶湧。舟子不得已。遂仍開去。家人皆憤憤。余亦覺不平。姑忍之。遂泊于下。三更時。忽一碼頭舟中。不戒於火。延燒大小舟千數隻。合江大號。死于火者。各半焉。問其地。正余欲泊舟地也。沙市船雖歸帮。然間有一

二隻者亦無不可。如當時堅欲進泊。彼亦無如之何。伊恐多一船則愈擠。而又少一隙地。火發時。余舟人皆合掌誦佛可知也。噫。冥冥中若或使之歟。

凶鬼

丁雪符述馬先生言。西蜀北社鎮李孝廉家。宅後造一樓閣。工人起土。忽挖出一巨罈。眾以爲金銀。請孝廉視之。自諭眾曰。此我前人窖的。工人唯唯。是夜率父子家人親往挖開。上蓋石板。封布數層。去其布。一股青煙直冲萬丈。頃間飛沙走石。屋動地搖。舉家皇皇。莫之所見。

惟孝廉見一凶鬼。身丈餘。頭斗大。鋸齒紅髮青臉。純身
鱗甲。幾至嚇死。鬼以手執孝廉曰。挈酒來。衆莫可如何。
急送以酒。頃刻數潭。不能滿其量。又呼要肉。每食數十
斤。晝夜不離孝廉左右。家人遍請僧道。不能革黜。並不
敢在此屋居。於是衆人遷避。惟孝廉難離咫尺。初則暗
者如市。後半年許。人稀屋荒。四壁滿然。而孝廉已形瘦
骨削。遂問巨鬼曰。我與爾何孽。爾何纏我至此。鬼言前
五百年孽。我焉能容你。後鄰里鄉黨。勸將以宅作廟祀
此鬼。孝廉從之。命名赫風觀。乃安然無事。

鍾馗

丁雪符云。余在都時。寓倪海槎宅中。其宅多鬼。卧不安。遂商之于居停倪。出一鍾馗。借倪鎮之。余懸之帳前。三更後。鬼聲鳴。鳴進門中。忽聞鍾馗畫軸大響。室中有軟底靴聲。屋中器皿皆動。余大驚呼。忽畫軸大響。風平浪靜矣。次日余索鍾馗于倪。倪曰。是不可與也。此畫乃余先祖在浙江某任。五日午時。延一有道全真。在大堂凝神畫此。旁立書。侑作呵叱之聲。以黑犬七。紅雄雞冠血七點目。此畫余珍藏家傳之寶也。安能與之。遂強收而

去。余悵然數日。

紀文達惡諱

紀文達公。雖一戲謔。皆人不可思議。如一平公娶親。紀送詩韻一部。莫不駭異。茫然。後平公思之數日。乃知之。蓋韻有平上去入。讀本字。每字一念。平切其姓也。又一林鳳梧進見。紀問命名之義。林夸曰。昔生時。母夢一鳳棲於梧桐。故名。紀浩歎曰。太夫人之兆。可謂美矣。設使不幸而夢一雞。盤旋于芭蕉之側。則足下之名。便不好聽矣。直惡謔也。又散朝時。一老宮留之。請說一笑話。方

走紀沈思曰。昔有一內監。此句之後。不言下文。老宮侯之移時。不能忍。詢之曰。底下何如。紀曰。底下。一樣無有。莫不絕倒。才大心靈。雖戲謔。亦人所難能也。

王節婦

丁云。滇省某鄉。有王節婦者。苦節四五十年。心如鐵。髮如銀矣。有一孤孫六歲。晚坐樹下嬉戲。忽突出一狼。啣去。被人噪逐。始棄而奔。滇省固多狼。土人謂之山貓驢。常出食小兒。此節婦獨孫。若被食。是無天道也。先君在時。每月給錢米焉。欲向有司言代爲請旌。不果。惜哉。

刺鱗

啟田又言浙江甯波某甲。力大膽粗。嘉慶初。白蓮教猖亂。披甲從征。奉令出哨。偕同人操火鎗。挾利刃而往。入一谷。口徑狹而歧。時霧氣迷漫。月光黯淡。五步之內。不辨爲誰。同人由他徑折去。甲以緩步落後。雖獨行。猶謂同人爲前驅也。約半里許。得大道焉。而兩面絕壁。古木夾道。叅天蔭地。更覺昏昏。忽狂風驟作。吼聲如雷。四山響應。驚心動魄。轉瞬有紅燈二。愈行愈近。心知爲虎。倉猝登樹而已。爲虎所見。虎徘徊樹下。不肯去。遂蹲伏焉。

甲急取火鎗。而鉛藥已失。無如之何。惟彼此共守之耳。夜深覺冷水澆面。以手拭之。面皮應手而落。痛甚駭甚。倒身向後。強爲仰視。覺樹杪有物大如斗。凸凹不齊。冷水自其中出。甲畧斂神志。輕緣枒槎而過。別幹于隙處。見其物長且大。似有鱗甲。樹故依山。莫窮其尾。知爲巨鱗。其如斗者。知鱗首也。甲心竊謂虎已不堪。鱗又相逼。有死而已。烏能逃。然幸鱗意在虎。不知有人。與待其驚。覺何如殺之。先絕一患。卽殺之不死。而爲所吞。亦同一死耳。何損焉。左右思之。無從著手。諦視良久。覺鱗呼吸。

時項上有扇動處。欣然得計。而解衣帶束利刃于火鎗末。曲躬躡足。如猱升木。迫近鱗身。而鱗仍不知也。急竭平生力。舉刃向動處刺入。鱗負痛直奔。勢極洶洶。山石角裂。樹木披靡。甲墜地。魂魄俱喪。身之有無。命之存亡。毫不自覺也。嗣覺耳中轟轟有聲。少頃如夢初醒。手足暑動。微開兩目。見東方已白。勉力自起。而起落者數回。坐定環顧。鱗虎莫知所之心甚慰。惟筋骨酥軟。艱于舉步。休息半晌。仍尋舊路而還。出谷口。遠見沙上卧一巨鱗。鱗前數武卧一巨虎。始悟鱗虎俱死于此。然鱗之死。

爲意中事。虎之死則不可解。不暇思索。踉蹌歸營。同人見其來。抵掌相慶。蓋疑其爲虜禽也。滿面血。痴人皆愕。然急詢之。甲具述顛末。大帥聞之。寬其不歸伍之罪。且壯其胆。洗去血痕。面上始復痛楚。帥令甲士數十人去解。鱗負虎而歸。虎頭幾斷。同人疑鱗奔時。虎不知所爲。亦奔去。鱗忿無由洩。遂噬虎。虎與之抗。被齧而死。故爲同死。所謂嫁禍于吳者也。理誠不謬。甲以軍功官至游擊。余友靈筠生中翰遇甲于武林。怪其眼耳口鼻或歪斜。或缺落。曾親詢其故焉。丁雪符云。

險韻

高宗純皇帝萬壽時。御詩自壽係六麻韻。衆大臣恭和韻時。惟中有一嗟字皆難設想。一江南布衣某因此事進謁某閣學曰。此何難。某已成一聯矣。曰。帝典王謨。三日若騶虞麟趾。五于嗟莫不叫絕。進御時。上大稱賞。閣學以實對。卽召見。賜一知縣。不受。固辭而歸。丁雪符云。

人足牛

吳虞吉觀察言。昔日過湖南郴州時。已停驂矣。忽街市

喧嚷。閩傳一人化爲牛。後二足猶人足。居停及僕從皆出觀。言之鑿鑿。先是某鄉有不孝子。摧凌其母。殆無人理。母饑餒恒無食。一日有人憐之。與其食。子歸大怒。奪食痛詈以去。母摸索飲泣。忽有叟過。問母具告之。且曰。子回則受虐。子出則忍飢。有子如此。將奈何。叟慰之曰。汝無憂。我有衣一件贈汝。可以禦寒。可以質錢。解衣遂去。子復歸。見之愈怒。奪衣着之。未幾忽遍身蒙茸毛蹄。悉現。遂化爲牛。特足不變。意天之畱以示報也。相傳元惡大憝。化牛者多。故牛常遭雷擊。余恐此人當世世爲

牛。世世遭雷擊也。丁雪符云。

鉅典

改天下爲郡縣。始於暴虐之秦政。因民之田而制稅。不復收爲公田。始於刻薄之商鞅。進士科。始於弑父烝母之隋煬。殿試。始於濫淫之武后。韻書。始於賣國弑君之沈約。五經印木板。始於長樂無恥之馮道。四書文。始於執拗誤國之王安石。請謚孔子爲至聖先師。以木主易像。始於逢君廢禮之張璪。請謚杜甫爲文貞。始於元內監。其中有其事甚是。而其人甚非者。有其事不甚是。而

至今相沿不改者。坐令千古要典。出於此輩人之手。而後世踵而行之。亦可怪矣。此丁雪符之言如此。余曰。君子不以人廢言。言尙不廢。況其事乎。

無名考

丁云。豫讓漆身吞炭。妻不識。友識之。友青芹也。赤壁吹洞簫者。四川綿竹道士楊世昌也。有句云。有客吹簫楊世昌。桃源漁人武陵人。黃道真也。潯陽妓裴興奴也。石敢當。劉知遠時勇士。

牛鼓

丁雪符云雲貴鄉中多牛糞。據土人言此二字未知是否。禁約甚嚴。

凡鄉中有妄取一物。或誤犯一事者。不訟亦不罰。但以木杆上繫一鐵鉤。擊鼓聚衆。每戶出薪一束。積而焚之。不分事之誤。故大小人之男婦耄倪。雖有司禁令。亦不遵。雖天倫行旅亦不免。真蠻俗也。聞貴州別鄉某女嫁牛糞之鄉。新婦不知也。甫三日。誤指他田爲首者大怒。擊鼓。俄頃薪積如山。新婦哀號。遍乞其中亦有憐之者。欲免之。首不聽。且促焚。新婦夫大恚。時手持一短荻。具趁人亂時。將烟袋玉嘴。潛置於爲首身間。大荷包內。俄

焚婦訖人將散婦夫大言曰適焚筒王嘴不知何人竊去首復大怒遍搜諸人無有也。眾人復搜首則儼然在荷包內。首大驚。雖知復仇。然無可辨。婦夫遂亦擊鼓聚薪而焚其首者焉。然貴州最多而最行。牛叢之鄉大有夜不閉戶路不拾遺之像。余游羅次過數鄉。見其竿焦黑如炭。鐵鉤亮如銀者。亦有微黑者。恒惴惴悲之。荒陬夷徼殘忍至於此極。從不經官。故官亦蹣跚省事。噫是誰之過歟。

瓦口寨

咸豐四年。回匪圍滇城。城圍甫解。余奉板輿避亂出省。路皆焦土。死尸枕藉。微行數日。將至曲靖府。地名瓦口。絮。夕陽在山。忽樹林中突出賊數百。殆圍城而敗潰者。攔路將欲搜殺。幸家慈於平素有膽。對賊云。行李皆聽取。素無冤。乞勿殺人。賊審視良久。問余何姓。余怪其出語不倫。且勢稍緩。遂答以丁姓。賊訛聞爲金挾余上輿。并代覓已逃僕夫。至云爾固不動。但同行者皆聽吾所爲。遂大加搶戮。頃間尸血載道。忽一人似兵役奔至家慈前。授以一囊。云此係陣亡某把總火化骨也。擲囊竟。

去。晚至曲靖。檢行囊未失纖芥。僕從亦未殺傷。是役也。蕭恭人李嗣元司馬鄧少君某及同行者約數百人。皆被害於道。不可枚舉。而余獨以問姓得免。豈金姓之人有恩於彼耶。計余幾死於刀兵水火瘟疫十一次。此其一也。把總骨遍詢無有識者。待其負尸之人不至。遂葬之。丁雪符云。

見聞隨卷十三

婺源 齊學裘 子治

范天球投猪還借

同治四年宜興東鄉卞瀆張鳳岡養猪賣與屠戶得錢數千文。剝白見猪耳上有范天球三紅字詢張姓有欠債人名范天球否。其家尋舊券果得范天球欠錢十千未還。此事陶士寅親眼見之。與我述其顛末如此。

飛龍

關東有物曰飛龍。形似母雉稍大。味甘寒。酒醬燐煤以

入醲醑之羹油輒澄澈食之美逾他品富將軍明阿督
師揚州曾出以餉客并云此物非高樹不棲清泉不飲
聞人步聲輒入空中急不可得殆其性耿介過於雉也

假弔神嚇走真弔神

金陵龍渡某村人某婦最喜假意投繯以嚇其夫先必
啼哭上樓裝束畢再行此詐夫患之商之伶人旦脚某
郎某郎曰是不難候其作詐時通知於我我扮弔神嚇
他一次他日後自然不作詐矣某然其言一日婦又啼
哭上樓某郎聞知卽扮弔神上樓嚇婦忽見婦背後立

一眞弔神。便大驚。跌倒在地。婦亦驚倒。眞弔神大叫一聲而遁。從此婦不投繯。能安於室矣。孫澄之云。

朱羅氏烈節小傳

應敏齋觀察

寶時

爲上海道時。有表弟朱孝錫。係杭州

仁和縣人。僉生在廣東游幕。十有餘年。因觀察太夫人是伊胞姑母。同治五年來滬省視。卽在滬城賃屋挈眷居住。詎於十一月初二日。孝錫因病身故。伊繼娶妻羅氏年二十四歲。痛失所天。悲哀欲絕。應太夫人遣人慰問。朱羅氏泣曰。孑然一身上。無可事之翁姑。下無可撫

之子女但能不辱門楣以保此身名節而已。至十二月十九日。逢孝錫終七之期。朱羅氏祭奠後。將所餘箱籠什物。概行收拾完善。閉戶仰藥。告其僕婦侍婢曰。今日吾得死時。後不復語。僕婢戚屬急相灌救。不肯下咽。延至次日。瞑目而逝。觀察憫其從容殉節。無愧完人。不忍令其湮沒不彰。據實稟報。虔請旌獎。以昭節烈。真盛舉也。樂爲書之。

鬼詐騙酒食

四川廖養泉明府

綸

與子言陝西人某乘馬到四川某

處見井上坐一男子。馬蹄踏人落井。某心怖。加鞭過去。行來十里。回顧馬後有鬼追隨。心愈怖。到親戚家。見鬼索命。某病狂。親戚許拜懺超度。不依。端索酒食。終日醉飽。則病者無苦。否則疼痛難當。一月後鬼去。人安。復乘馬于歸。快到井邊。心更怖。恐落井鬼又來索命也。正徘徊路側。忽見落井人蹣跚而來。指謂某曰。爾真忍人也。見我落井。不思救援。反加鞭逃去。若非枯井。一命休矣。今又相逢。爾有何說。某口不能言。面無人色。觀者如堵。墻衆論紛紛。某始知落井人未死於井。索命鬼詐託謀。

食竒哉怪哉不信世人行詐之風竟移之於鬼蜮也噫

天雨豆地生毛

金陵孫澄之廣文

文川

工詩古文詞與余遇於應敏齋

觀察衙齋酒後談鬼之餘又說白下未遭兵亂之前見
地上小豆紛紛皮黃實綠可以療飢人曰此天雨豆也
又見地上生毛如樓因得詩兩句云天憫腹枵因雨豆
地憐膚剝故生毛

詹長人

婺源北鄉虹水灣詹衡均身長九尺頭如斗大腰大十

園娶吾祖母俞太恭人之使女節喜爲妻生子四人長
庭九身如長人次進九三壽九四五九身長如其父同
治四年冬夷人聘五九二十五歲至夷場閉置一室來
看者每夷一洋錢聘金每月六十元五年正月夷主要
看長人因以九千洋錢包聘長人到英吉利國代長人
娶一妻一妾同到外國居爲奇貨亦可怪也聞將回滬
特爲記之六年六月初七日余心軒表弟晤於滬上口
述如此

伶人張錦死節

吳門伶人張錦爲二面脚色有名於吳久矣年四十餘
庚申四月十三日蘇城失守賊入張錦家索洋錢張以
當十錢包二百枚爲兩封獻於賊賊開視知是銅錢大
怒謂張行詐欲殺之張曰我爲戲脚何來洋錢爾爲逆
賊終日殺掠爲事天譴難逃爾今殺我我必爲烈鬼殺
爾矣賊大怒殺張張未死罵賊不絕聲賊復殺之乃死
張猶怒目握拳其狀甚烈賊退鄰人殮張瘞於城中吳
人與余述其死難甚詳余曰張一伶人耳其所演戲半
屬奸邪之輩其死節也何其壯哉雖古之忠臣烈士罵

賊而死者不能過之。噫如斯人者豈可以伶人而少之哉。

史家醜婢爲活財神

盧品珊與余述宜興城中史紹文進士之祖茂才貧甚。傍伴入都館某明府家居。停有婢女貌醜如鬼。事史甚勤。史好之。逾年居停放外任。邊省爲縣令。史不能從。因辭館歸。宜居停贈之川資。并贈以醜婢爲師好婢服事之勤也。史歸將館金三百兩畧償宿債。隨手散去。貧窘如初。自言寒士無銀之苦。搔頭搓手。寒態百出。婢見之。

謂主人曰所謂銀者何物也主人告以銀之狀銀之用婢曰是不難取之物何憂爲主人曰汝目有所見也何言銀之易取也婢曰能依我言銀取之無禁用之不竭也主人詢婢所言婢曰快買香燭猪頭三牲花費千文錢交我到彼狹街裏古井旁供請財神移時君去叩頭虔禱自有所見切勿怕也主人信其言依其所需而與之婢卽持香燭三牲携入狹街井旁移時主人親去拜禱見雙燭碧光射人凜凜可畏醜婢頓失所在俄見金甲神手提金剛杵謂史曰汝須寶銀若干汝自說來史

曰一萬兩足矣。于是金甲神入井中。發出寶銀一萬兩。堆積井之四旁。史叩頭謝神。取銀安置內室。從此營運無不如意。利市三倍。至今尙饒於財云。

和事嶺

婺源東鄉烏坑。有兩親家某某。結訟進城。同上高嶺。嶺路崎嶇。十分難行。因小憩嶺側。相對談心。謂因言語不和。結訟到城。不論理是理非。總要花錢。既花了錢。還要傷了和氣。到不如兩家將此結訟之錢。造了此嶺。使千百歲後。往來行人。感德無窮。豈不是好胡訟爲兩心和。

同還家各興石工造此峻嶺後之人名其嶺爲和事嶺。至今傳言不替云。余曰。易云訟則終凶。諺云衙門八字開。有理無錢莫進來。又曰。情願氣死。不要打官。私甚言訟之不可結也。今記和事嶺。因有感於斯言。

咸豐縣孝子

丁雪符述友人盧敦五司馬言。承乏湖北咸豐縣時。某地數百家居民輻輳。一夜忽陷爲潭。中有劉光貴孝子也。其屋移至卅里外。天曉出門視之。四無居鄰。在溫黃田中。屋中樹木以及所有用物。皆移於此。溫黃人以強

占結訟時陳達甫太守知安陸府事親至縣踏勘不爽無不駭異聞之中丞胡問芝先生贈銀三十兩欲奏不果此事通省皆知天之重孝子如此余樂爲書之爲世之事親者勸

蛇變青蚨

戴汝登聞車夫云三山營某村某家人早起見廳堂梁壁盡挂青蛇百數十條畏甚延道士拜懺焚紙錢送之越一日開廳堂門視之梁蛇不見祇見滿地青錢一百六十餘千文丁卯三月間事

杉樹將軍

婺源城外湯村街有古杉樹一大株。咸豐十一年西寇犯婺源。官兵築營杉樹有礙營門。主帥命伐樹。兵奉命伐樹。頭遂昏痛。手不能動。稟之帥。帥怒。易兵伐之。兵遂噴血不能起。帥聞之心駭。親來樹下祝之曰。汝能助我滅賊。當奏聞。天子立廟奉祀。封汝爲杉樹將軍。是夜樹神示夢。約先破賊巢。驅賊出境。主帥信其約。舉兵伐賊。賊果遁。境內安。主帥奏聞。奉旨立廟。封樹神爲大將軍。至今香火大盛。男女祈禱。殆無虛日云。

戴希英冒火救母

明朝戴希英世居婺源西鄉巖前。一日其家失火。二三四弟只知運財物出外。不顧其親生。瞽母死活。希英從外趕歸。蒙水絮被。蹈火中。負繼母出外。母曰。我平日待汝極惡。今日救我出火中者。還是汝。我生三子。皆不顧我死活。汝真孝哉。願汝千子萬孫。以報汝孝。希英後嗣至今綿綿。幾有萬丁。其餘三房絕嗣。無一存者。誰謂天道無知也。萬善孝爲先。爲人子者。其可忽諸。巖前戴毓雲口述。

雄海關

巖前戴毓雲之父十約。今年六十有一前年夢到陰間
遇一人謂之曰爾何往來何事戴曰我弟年未五十便
去世我要求君同到陰曹衙門細查陽壽恐爲陰差誤
捉耳其人曰未滿五十死者皆入罔死城中予不能同
爾去查爾之年壽可代查之戴遂請從之去至一處見
大衙門中間豎匾雄海關三大字左邊橫匾彰善闡惡
四大字右邊橫匾善惡分明四大字進大門上大堂木
闌干外立定其人進取簿書出示戴簿上書婺源佳巖

戴十約年古稀有二閱畢命戴速出回陽毋少畱戴驚寐其子毓雲同寓泰州口述如此

李堪輿

江北口岸李某堪輿爲業年五十餘患病在床一夜被陰差喚去至一大屋中見諸衣冠中有相識者畱之坐談遂同去見一王者高坐大堂之上謂李來何故李對曰蒙差使喚不敢不來王命判官查李年壽判官查之云李壽七十有四王怒指差曰混喚人來重責一百大板李代求免責王不許痛責揮去王因命李入內堂賜

坐賜茶盛饌以待飲罷謂李曰我清江人祖墓在清江某處墓前爲人造屋遮蔽風水君回陽望到清江代我理直爲懇勿忘也李敬諾唯唯而退王命輿馬差役護送回陽家人聞門外馬鈴聲到門而止怪之李床上病蘇坐起口述陰間情事遂乘船到清江訪問某姓名墳墓果爲人墓前造屋遮住風水李遂申明地方官立折房屋還其舊基歸家夢見閻君來謝云張紫章婺源人口述如此

帶陰差替死

婺源巖前戴福元娶妻有年未得一子其母苦節長施乞丐以米一日有帶陰差戴某來向福元說昨夜陰曹點簿註汝絕嗣不久於人世矣吾與汝善不敢不告其母聞言忍而不哭夜靜背人膝行至村廟神前禱告願以身代兒死求閻君免其絕嗣以存祖宗香火越二日帶陰差某奔來告福元曰昨夜陰曹因汝母禱求以身代子死免于絕嗣陰判細查汝母積年施舍長生米其善可嘉其子可免絕嗣遂責我漏洩陰間事情痛責數十板再查我在世行事無善可取不如替福元死了此

一重公案因此特來恭賀并以告別去後數日帶陰差某果然無疾而終福元現有二子四孫衣食頗足丁卯九月初二日戴毓雲口述余曰一施長生米其善足以補絕嗣之過而況世之博施濟眾者其德報爲何如哉書之爲世之樂善好施者勸

救一家添壽一紀

張紫章與余云泰州有一人忘其姓字趁船過江船中先坐一人酣睡旁置黃布包裹露出一紙上有人名某竊取閱之己名在首知爲帶陰差者捉人名單俟其睡

醒長跪求緩數十日。以便歸家料理後事。帶陰差者見其哀求。憐而憫之。遂將已名倒置在尾。令其速歸。約期來喚。某拜謝而歸。途中見有夫妻相抱大哭。難分難捨之狀。驚而問之。其夫曰。我父被人謀害。置在獄中。今有友人代爲排解。必須二百金。方可出獄。免罪。小子家貧。只有一妻。不得已賣妻。再擬賣屋。庶救父出罪。今妻已有受主。片刻將離。故此慟哭耳。某聞言。心惻曰。勿哭。勿賣汝妻。從我回家。取銀二百兩。贖汝父出獄。免罪。另贈百金。服賈度日之費。其人贖出父。罪出獄。并得服賈之

資父子夫妻依舊團聚樂不可支拜謝而去某抵家速辦後事安排家務停當坐以待斃一日忽見帶陰差者來喚又聞門外馬鈴聲見陰差持札來報云某因途中救人父子夫妻團聚功德添壽一紀帶陰差者速去毋少畱余曰一念之善救人一家之難便添壽十二年而況世之爲大功德濟億萬人者其壽無量蓋可知矣余故曰害人者害自己也濟人者濟自己也所謂君子樂得爲君子小人罔了爲小人諺云救人一命勝造七級浮圖又云人有可延之壽以此觀之益信其言之不我

欺也

岳阜題壁

吳淩城中有岳阜。崇祀岳鄂王。江山環拱堂下。曠然大觀。真勝境也。余游岳阜。慨然有作得一長歌。久刊問世。冤獄責在高宗。暗使秦檜殺鄂王。以固偏安帝位。丁卯秋重登岳阜。見子功成。猶子功炎。外孫貳之。偶於壁間見一詩。意與余同。抄貽云。崇祠在高阜。時難復登臨。碧樹自春色。青山空鳥音。欲加名將罪。豈獨佞臣心。冤獄成三字。高宗意亦深。署欵延秋二字。不書姓氏。功深見

卓必傳無疑書之以公同好余詩附錄於後

吳陵岳阜謁岳鄂王廟歌

高宗南渡據神器二聖還朝置何地長君之惡伊何人十二金牌出奇計鄂王不死金必亡東京克復無建康高宗避位歸藩邸不爲天子爲諸王檣也乘間居奇貨鄂王乃在楊側卧嗚呼何待風波亭朱仙一戰獄已成不聞檣語是上意鐵案莫須有三字已拚笑罵由他人且固偏安君相位史書矯旨檣殺之爲尊者諱何須疑不越境與不討賊春秋誅心歸罪誰

東窗詭謀承旨耳。彼婦長舌何能爲。觀其褒贈有深
意。檜死封王復封煢。煢封旋令煢致仕。委曲保全情
可知。檜也遺臭千萬世。高宗隱隱無人窺。惟王當時
識此意。君賜臣死。胡容辭。今日趙家無寸土。吳陵一
坏名。岳阜同時部將聚一堂。懍懍英風振千古。子死
孝兮父死忠。萬年俎豆何其崇。我來陟阜携孤筇。拜
瞻王像淚沾胸。王書自譜滿江紅。忠貫日月聲摩空。
昔年摹勒寶稷中。碑照天地光熊熊。余刻寶稷室法帖二十四冊王
書在焉方今盜賊如屯蠡。海陵一隅慶安壙。豈非王靈

保障功江南一帶無數峯羅列堂下如附庸大江東
去浪淘淘落日蒼莽悲英雄感時懷古歌當哭譜入
迎神送神曲騎驢湖上豈無人茫茫遠海搖空綠

丁卯科場記異

丁卯江甯鄉試戴彝齋明經場後回泰州與余云有宿
遷人忘其姓名年一百零一歲本年入泮秋闈三場考
畢文字不差精神矍鑠望之如神仙中人曾中堂國藩
擬奏爲人瑞又卷房失火見魁星跳躍卷未傷火亦旋
息有八十歲老人場中文成交卷忽發病身亡適有幼

子同號得以送終亦一奇也。吾兒功成場中見一士子
文寫三藝未畢忽大書天理二字又書忽然錯了四字
再畫蘭花一枝復以墨汁灑卷發癡擯出號去。又見一
士裸體赤脚奔出頭門口稱賊中憤掘塚剝屍衣致有
冤鬼剝我衣履逐我出去不許我作文云。又聞程笠青
六十九翁說前有上江士子四人各帶一僕到江甯租
寓租金四十先付十金後搬行李進寓。寓東見四士人
後有一少年美婦隨入寓東駭之。因謂四士曰我租考
客不租眷口。君等携一婦女來何也。四人曰本無婦女

爾獨見之。是大不祥。我等速回故鄉。不敢應試去。寓東
送客出門。回家見鬼婦猶在堂屋。怒謂房主人曰。我萬
苦千辛。方尋得冤家。討替被汝說破機關。我不能報
讐。今日定取汝命。以雪吾恨。房主人曰。無怒。士去不遠。
汝去索命。何遲之有。女鬼曰。噫。場屋中奉命申冤。可以
索命。今被聞爾言。懼而回去。不進考場。萬難下手。今索
汝命定矣。房主苦求。許以齋懺。卽將十金超度。乃去。崔
懷卿云。場中以竹籤籤心者。有人以刀剖腹抽腸者。有
人斷臂者。有人至於在場出場病死。者不一而足。由是

觀之士之無品敗行者不宜下場免遭顯報書此爲習
舉子業下大場者戒

童勇誓報

登州蔡鶴門司馬

允壽

咸豐初年爲桃南同知在豐工

督辦築壩聞少婦喊冤問知少婦蕩山縣人李德輝廩
膳生之女也嫁顧氏子隨翁姑夫壻逃水災被衆沖散
獨身爲無賴所困故此啼哭喊冤蔡遂收留少婦於別
室雇老婆子伴宿遣人尋其父李德輝來認李至父女
相見泣訴前事蔡遂贈李百金同人樂助二百金共成

三百金。李感德不盡。又慮父女回家。身重難行。恐被人側目。蔡欲擇役遞送。卽有徐州人童勇。前來討差。送李回去。蔡素知童勇盜嫂爲妻。不法之徒。不准其請。童遂對天發誓。如有見財起盜心者。死被狗食。蔡見其發惡誓。遂命之送。再加十餘金。與李作路費。交童收下。代李開發車力。飯食賒。後數年。蔡避地淮城。李來拜謝。始知李得金。重整家園。復還舊業。居然小康。其女婿親家皆團聚一處。時童勇已死。埋大黃堆。與其嫂同穴。俱被狗食。因問李當日送歸情狀。李曰。老公祖所賜路費十餘

金皆係童舅藏匿未吐一金到家後將數十金藏在房中抽替內亦被童竊去蔡始知童誓之顯報也同治六年丁卯十月二十七日余訪鶴門於上海陸氏花園口述如此

古樹能言

壽州禹王山頂有古白果樹不知其年壽幾何相傳禹王問樹幾千年卽此樹也咸豐初年捻匪張祿行兵過樹下張欲焚樹樹大聲疾呼張賊曰汝若焚我叫汝連打敗仗一百回張怒命焚之賊去未及半時而火自滅

嗣後張賊連打敗仗。被官兵擒而誅之。四川周以忠口述周卽蔡鶴門之親戚也。

朱福保惡報

朱福保舉人。吳縣人。日以詐騙橫行。包攬詞訟爲事。道光二十年間。朱被人告發革去舉人。長禁獄中。咸豐元年大赦出獄。依舊故態復萌。無惡不作。吳人憂之。庚申之變。蘇城失守。朱爲賊羽翼。設計害人。同治二年。蘇城收復。朱逃至東洞庭山。山人見朱來。駭甚。聚衆擒而誅之。投屍太湖中。吳人爲之大快。丁錦帆口述其事。特書。

之爲世之包攬詞訟無惡不作者鑑

土地押妻

泰州南門外東村有土地廟。一日失去土地婆婆。鄉人遍尋。竟於西村土地廟中見有兩位土地婆婆。東村疑西村人盜去。遂抱之而回。仍置土地婆婆於座上。明日視之。土地婆婆仍然失去。衆人又到西村廟中。又見土地婆婆兩位在座。于是東村人與西村人爭論。結訟官亦難明其故。是夜東村土地示夢東村衆人曰。勿興訟。是我與西村土地賭錢。輸銀四十兩。無銀還賭。賒只得

將婆婆抵押。限期未滿。尙未成親。望諸君見憐。將紙錠若干焚之於西村土地廟。則可贖回婆婆。否則婆婆終要過去。不我有矣。問紙錠一張抵銀多少。土地曰。一張紙錠可作銀一錢五分。於是東村衆人依數焚銀錠於西村土地廟。明日土地婆婆自回本廟座上。嗣後土地公婆一雙。至今尙在。泰人傳爲美談。老少皆知。亦一奇也。余曰。世人好賭輸錢。賣妻還賭賬者多矣。不信土地公公。旣爲一方之正神。亦染此惡習耶。土地輸錢質妻。尙有衆人焚錠贖回。團聚如故。世人輸錢賣妻者。不知

可有土地公公代爲贖妻團聚如故否耶書之爲世之
好賭賣妻者戒

李湘舟死難

吳門伶人李湧號湘舟事親孝順作人正直能傳神善
畫戲文無不逼肖其情狀天生妙筆非畫師所能及也
住顏家巷吳中名流善畫者皆好與之往來其爲戲則
做奸臣醜腳其爲人則中正和平余曾見之庚申之變
李死於賊中惜哉

雷擊惡夥

無錫蕩口飯店中有客人身懷洋銀四十元飯罷出店遺失銀包在店店夥某見而匿之客來店尋銀包不見因向店夥索取銀包許以十元酬贈店夥不認回客未見銀包反畱客喫點心出賣毒藥放在麵中客將下箸忽然腹脹要如廁天頓昏黑霹靂一聲只見店夥手捧銀包跪在客前已被雷擊死矣麵變黑色始知其置毒殺客也同治元年事丁錦帆口述書之爲世之謀財害命者戒